

MERCURII EUROPÆI

DE PACE SEPTEMTRIONALI

D I V I N A T I O

S I V E

De instantibus , Polonos inter ac Suecos , & partes
utrinque adhærentes, Tractatibus Pacis,

D I A L O G U S.



Bib. H. Bukowskiego

~~1744~~

Anno à reparata per CHRISTUM salute

MDCC LVIII.



177731

I hr



MERCURII EUROPÆI

DE PACE SEPTENTRIONALI

D I V I N A T I O

S I V E

De instantibus , Polonos inter ac Suecos , & partes
utrinque adhærentes, Tractatibus Pacis,

D I A L O G U S.

L E C T O R I.



*Ostquam multis abhinc annis Mercurius, Divûm
hominumque interpres ac nuntius, GALLOBEL-
GICI potissimùm assumpto nomine, multa orbi nun-
tiavit; EUROPÆI nomenclaturâ nuperrimè as-
sumptâ, quæ POLONUM, SUECUM, &
LIVONEM, inter se alicubi differentes auscultando, observa-
rit, & memoriâ exceperit, eadem qua solet fide, hunc in modum
enarrat.*

S U E C U S.

I Tanè verò, ô boni vos? Pacem, Polonum inter, atque Exercitum Zaporouiensem, qui Cosaccorum jam obtinuit nomen, constitisse fama est! **POLONUS.** Fama est, & quidem certa: quippe eam Triumphus in castris sub Torunio actus, excepit atque comprobavit. Faxint Superi; ut futuri mox Vobiscum de Pace Tractatus, & Famam & Triumphum nobis similem pariant! **LIVO.** O, utinam faxint! At enim. **SUECUS.** Quid verò istud, *At enim?* Proloquere, atque ede fœtum, quem parturis. **POLONUS.** Videris mihi de futurâ, quam speramus & desideramus, Pace, nonnihil subvereri, aut potius ambigere. **LIVO.** Quidni ambigam? Quoties enim Vos Poloni cum Sueco Pacem sanxistis? at, quando, & quam tandem certam ac firmam Pacem consecuti unquam estis? Mittamus fœdera, cum Carolo Sudermanno, toties in Sueciâ ac Livoniâ nostrâ ieta, ac toties itidem, tametsi nusquam à Polono, rupta; præsertim verò Anno MDCXXI, cum Polonum, adversus Osmanem Turcarum Imperatorem, sub Chocimo dimicantem, & prorsus Murum Christiano orbi, (cui tum ille barbarus inhiabat) sese opponentem, Gustavus Adolphus, quasi à tergo adorsus, Rigam & magnam Livoniæ partem eripuit: mittamus, inquam, ista; quæ vis ac robur fuit nuperis in Prussiâ fœderibus, quæ Stumdorffensia vulgò audiunt, cum eodem Gustopho Adolpho pactis? sexennium propè ad eorundem pactorum decursum aberat, cum Polonis, civili Cosaccorum, & vicino Moschorum, Tartarorumque bello implicatis, Carolus Gustavus nihil minus expectantes invasit; & ea Pacis fœderumque, ubique impressit vestigia, quæ sine lacrymis, vel ipsi hostes, vix queant intueri. **SUECUS.** Aut rudis admodum es, aut etiam malignus, qui ista recoquis. Non legisti **CAUSAS** in lucem nuper datas, ob quas Rex meus Carolus Gustavus Polonum adoriri bello coactus est? **LIVO.** Rudis audire haud gravatè possum, nequaquam tamen malignus; etiam dum causas illas tu, tanto iactas opere. Quod dum facis, nunquam

quam aliàs te magis rudem, atq; rerum inanem exhibere orbi potuisti. Quæ enim & quales Causæ illæ fuerint quieas *Limavit ac Eliminauit*, patriâ utique Suecus, cum ceteris omnibus, tum ipsi quoque Regi Tuo satis ostendit. Certè ipse Carolus Gustavus, ubi præclaras scilicet, illas Causas, ab Oxenstirnio Cancellario suo editas, & à Gregorio Borasto ita Limatas atque Eliminatas in Prussia accepit & expendit, ad Oxenstirnum conversus, Tu verò, inquit, Cancellarium hac in re egisti, ut parenti tuo, Regni itidem Cancellario, ne quidem tantillum responderis. *Polonus*. Quidquid sit de foederibus hætenus ictis, quæ jam scribentur, adamante notabuntur. *Livo*. Dudum novi tuum, & quorundam Polonorum tuorum genium: nihil magis, quàm Pacem vel iniquis conditionibus, & maximo adjunctarum Reip. Provinciarum, maximè verò Livoniæ nostræ incommodo, ne dicam exitio, factam anhelatis. Ita vobis, de alieno, ut ajunt, corio ludere, volupe est. Ita quondam, cum à Tartaris Podoliæ, & universæ Vkrainæ partes foedè lacerarentur, quibusdam vestrum indulgere genio maxime allubitum fuit; ne etiam Kochanovio, & Kochanovii Parodo, summis utique Poëtis vestris, necesse fuerit ad lyram ingemiscere, & canere. Sarbieu. lib. 4. ode 5.

Æterna labes, nec reparabile

Polone damnum! Podoliam Getas

Impunè vastare, & dolendas

Ponè Lyram numerare prædas!

Eheu pudendum! &c.

Heu rumpe somnos, & vigiles age

Polone curas. &c.

Surgemus? an nos distinet aurea

Mensa suppellex? Quos manet (heu dolor!)

Hac mensa convivas? Is auro

Nempe bibat, cui dulce ferrum est.

Ita nuper, cum Lituanix Livoniæq; nostræ urbes ac Provinciæ, obvio cuique hosti in prædam cederent, plerisque vestrum, in

Majore præsertim ac Minore Polonia, hoc est intra intima Reip. ipsius viscera degentibus, & *procul*, ut ajunt, à Jove, *procul à fulmine positus* (quòtus enim quisque istorum, aut in hostes fulmen manu arripuit? aut dignas Jove concepit iras?) aliarum Provinciarum spectare ruinas, propemodum ludus erat. Nunquid hac etiam de causa, divina evigilavit Nemesis, & nuperri-
mè hostem in hæc ipsa intima Reip. viscera grassari tandem per-
misit? ut nimirum discerent, quàm sit dulce bellum inexpertis;
aut potius, ut scirent, quo loco esse debeat, in civili quoque re,
illud Gentium Doctoris, 1 Cor. 12. 25. *Id ipsum pro invicem solici-
ta sunt membra; & si quid patitur unum membrum, compatiuntur
omnia membra*, & illud paullo ante v. 21. *non potest Oculus dicere ma-
nui; Operâ tuâ non indigeo; aut iterum Caput pedibus, non estis mihi ne-
cessarii*. Equidem sunt Podolia, Moldavia, Valachia (uti in Aquilæ
Polonæ Chorographia nuperrimè ostensum) aut pedes, aut
pedum digiti; aut denique etiam unguis; sit Livonia cum suis
Provinciis, non tam caput, quam aut capitis vertex, aut rostrum,
aut saltem plumæ ejusdem Aquilæ; partes nihilominus sunt
ejusdem Reip. membra ejusdem sunt corporis; ut indignissi-
mum sit quando nonnullis illæ voces, ad quasdam partes &
membra excidunt, *Operâ vestrâ non indigemus: Non estis nobis necessa-
rii*. POLONUS. Et quis unquam inter Polonos, tam vacors
fuit; qui hæc aliquando usurparit? quis, inquam, aut Vkrainam,
aut alias Reip. provincias, minus existimavit necessarias? Et ut
fortasse aliquæ, etiam minus alicui viderentur necessariae, quis
non fortissimè defendendas, & ad extremum, ut sic dicam, un-
guem conservandas censuerit, quæ tanto vel majorum sociorum-
vè partæ sunt sanguine, vel tanta, & tam firma ad societatem
Reip. accedentium populorum voluntate acquisitæ? LIVO. Qua-
ris, qui istiusmodi fuerint, aut etiamnum fortasse sint? Quasi ti-
bi exciderit, quæ nuper ille, qui Stumdorffensium pactorum vi-
debatur Alpha, despuerit oracula. Cum enim fortissimus Re-
gum, & à Moschis juxta ac Turcis, eodem illo tempore perdo-
mitis, gloriosissimus Vladislaus, quique tum aderat, propè ad
mira-

miraculum florentissimus Polonorum exercitus, illud altissimè impressum cordi haberent, *Arma ferent pacem*; adeoque hostem extra Reip. viscera armis exterminandum putarent; ille (cui non tam gladii, quàm calami usus erat) ut pacem, quam accepta cum nonnullis pecunia jam vendiderat, non pugnando, sed paciscendo quærendam necessariò ostenderet, illud disertè proloqui non est veritus; ut in naufragio merces, etiam carissimæ, quò navis allevetur & servetur, in mare jactandæ sunt; ita, ut Regni Reiquepub. istius navis servaretur, inter alias merces, Livoniam, (heu qualem, quantamque Provinciam! patriam meam carissimam!) intra hiantes inimici fauces projecit. POLON. Reminisci utcunque possum, qui vir ille fuerit; cui tamen, uti & aliis quibusdam, aut venditam pecunia pacem, aut jactatas citra tantam necessitatem merces, objectari abs te nollem. SUECUS. Nollem & ego; veritate nihilominus adactus turpissimum existimo, ingenuum in re justa, non agere testem. POLON. Et quale tu perhibebis testimonium? SUECUS. Quale multarum in Prussia civitatum, publica Acta & Tabularia perhibent. Cùm enim illa tempestate, Duci & universo Prussie Ducatui, nihil magis esset in votis, quàm ut Pax, non gladio, sed stylo, & quidem quàm citissimè sanciretur; quæ non pecuniæ illinc profusæ sunt, ut quorundam Procerum, & illius ipsius præceteris, emerentur suffragia? Adi, si lubet, quarundam in Prussie Ducatu civitatum publicas tabulas; invenies hodieque non paucorum nomina libris inscripta; invenies etiam, quid, & quantum quisque eorum æris, ut pacem venderet, acceperit: ut vix sine lacrymis referri queat, quod ii ipsi, qui eas tum pecunias numerarant, vulgò jactarent, Omnia apud Polonos esse venalia; Christum ipsum, si quis præsentem numeret pecuniam, vendituros. Quæ ego referre non ausim, nisi his ipsis auribus, coram accepissem. POLON. O probrum gentis universæ! Quàm vellem tabulas illas, & tabularia, quorum meministi, adire? LIVO. Et quid tabulæ, aut libri civitatum adeundi? Nonne satis tum patuit in uno Vladislai Regis vultu, quàm iniquè Proce-

rum

rum nonnulli, & secum, & cum Repub. egissent ! POLON. Si-
quidem tales aliqui fuerint, sentiunt utique id eorundem Ma-
nes: at non tales, ut spero, erunt, qui paciscendis jam fœderibus
destinati sunt. LIVO. Spero & ego tales non futuros; vereor ta-
men, ne, aut nimio pacis desiderio, aut belli intra viscera Reip.
hactenus sœvientis fastidio, ad eas præcipitent condiciones, quæ
non minus ut priores deplorandæ, & posteris æternum sint dete-
standæ; non sine adjecto paciscentium Manibus æternum du-
raturum maledictio: ut nihil de Justitiæ divinæ in eisdem severi-
tate dicam: nisi fortè & hic locum putent esse illi, quod in Pan-
dectis suis, nescio quo gustu, etiamnum servavit: *Nos tamen
sanctiones, & rigorem justitiæ divinæ mitigantes, statuimus.* SUECUS.
Nimium urges, & plus quàm Rhadamantum videris agere; præ-
fertim, cùm in futura Pacis tractatione, omnia sint & æquiora
speranda, & faciliora. LIVO. Etiamnè cum vestris hominibus,
& faciliora, & æquiora omnia fore, tu possis adpromittere? SUE-
CUS. Quidni possim? LIVO. Quoties Lubecæ, quoties alibi,
cum Vestris agi coeptum? Et quam æqua atque expedita erant
omnia? POLON. Benè equidem mones: sicubi enim, hic certè
verum erat, *Nodum ubique à Vestris in scirpo queri;* & omnia agen-
do, illud ad extremum agi, ne *nihil omnino agatur.* SUECUS. E-
nimverò agetur tandem, pro voto etiam vestro. Quod quidem,
vel ex amplissimi Regis Galliarum Legati, nuper à Rege meo è
Dania reducis, testificatione, audire in Comitibus Varaviæ potui-
sti. POLON. Potui audire, & audiui, sed iste galli vestri cantus,
triennium toto hoc Regno jam personat; cum interim nihil
aliud sequatur, quàm juxta divina oracula; *Dicunt, Pax; & non
est Pax.* LIVO. Miror homines nostros, ad tam diuturnum &
tam sonorum cantum, necdum excitos satis vigilare; aut si vi-
gilant, veterum ab oculis necdum planè excutere. SUECUS.
An tu necdum satis vigilare eos putas, qui, cum sub ipsum quo-
que Comitiorum tempus, nonnisi armis quærendam vobiscum
pacem censuerunt, simul atque Galliæ Regis Legatus advenit,
& novas à Nostris condiciones attulit, ita evigilarunt, ut nonnisi
futuris

futuris de Pace tractatibus invigilent? Quo enim aliò magis sunt intenti? LIVO. Non nescio, vel ipsâ belli nausêâ, eò intentos esse: veruntamen, si istarum conditionum sive æquitatem, sive facilitatem, ad æquam rationis trutinam expenderit, millies utique magis ad bellum, quàm ad pacem, perinde indecoram ac noxiam, inclinabunt. POLON. Quantum publica fama didici, Conditiones pacis, à Sueco, istæ per Gallum proponuntur: ut Regio Sueciæ titulo æternum vale fiat: ut Livonia, quanta quanta est, à Polono avulsa, tota Sueco cedat: ut etiam Curlandia ac Semigallia; idem cum reliqua Livonia jugum subeant: ut Prussiæ loco, quinque Imperialium milliones Sueco persolvantur: ut Suecus, quoad dicta æris summa ex asse fuerit numerata, Elbingam, Mariæburgam, & quod vocant, Caput Vistulæ, quasi hypothecæ loco, possideat. LIVO. O præclaras! ô æquissimas! & ô facillimas pacis condiciones! SUECUS. Quid ni vero? LIVO. Mirum, ni ad majorem istarum conditionum facilitatem & æquitatem, etiam adiicitis; ut & Prussia Regia, & Samogitia, & aliæ Regni Provinciæ vobis accedant. SUECUS. Quid Prussiam curemus, quam capite adhuc prehensam tenemus? Samogitia, ut nostra fortasse non sit, erit tamen Ducis Curlandiæ, ubi ejusdem Ducis Provinciæ cum reliqua nobis Livonia accesserint. LIVO. Itanè vero, Curlandiam spe jam devorastis? SUECUS. Nostra illa est, sive Dux Curlandiæ vetus illud audiat, *Veteres migrate coloni*, & Samogitiam obtineat; sive intra suos etiam relinquatur lares, dummodò Sueco deinceps, & non Polono Vassallus sit; atque ita supremum, sive basium, uti vocant, etiam Curlandiæ, uti & totius Livoniæ, jus non aliò, quàm ad nos pertineat. POLON. De Livonia sua, nunc, ut spero, audies: de Samogitis, ausim ego tibi spondere, ante perituros ultrò universos, quam ut jugum istud subeant. Si enim & olim, plura ante secula, à Theutonicis in Prussia regnantibus subacti, & impotentius habiti jugum ita excusserunt; ut conspiratione facta, intra diem unam (cujus etiamnum, sub ipsas Divi Martini ferias, memoriam quotannis non sine lautitijs & solen-

nibus epulis obeunt) ad unum omnes contrucidarint; si iidem, hoc ipso bello, præ omnibus ferè Lituanix Polonixque populis, non unum hostem sapius nacti, in tantis finium suorum angustiis, & tam exiguo suorum numero, semper adverso pectore omnibus obviam iverint nec rarò victores redierint; si denique iidem, ad veterem suum morem aliquot vestras legiones, intra unam quoque diem sustulerint: tu tibi de iis persuadeas, ultro nunc, quasi Caudinas quasdam furcas subituros? **SUECUS.** Si Samogitiam negas, quid igitur aliud nobis obveniat, quo restituendæ Vobis Prussix damnum, & impensæ hujus belli sarciantur? **POLON.** Quin imò; quid vos nobis rependitis, quo tot & tanta, per universas Provincias illata Reip. damna sarciantur? Si priores bellum movissemus, si fœdera pacis rupissemus primi; si in Sueciam ita, uti Poloniæ à Vobis factum, igni & ferro grassati fuisset; tum enim verò repetundarum nos postulare fas utrumque vobis fuisset: nunc, cum & fœdera pacis à vobis rupta sint, & primi nobis, nobis, inquam, tot bellorum aliorum procellis, domi forisque implicatis, bellum iniquissimum feceritis; cum tantam insuper provinciarum omnium vastitatem ubique post vos reliqueritis, pretium adhuc operæ & minerval reposcitis? **Satin? sani estis? SUECUS.** Satis profectò sani fuimus, cum pacta nuper in Imperio Rom. fœdera, Monasterii Vestphalorum, non ante, quàm persoluto nobis, haud sanè levi ære, absolvi & firmam passi sumus: neque nos isthæc pacis firmamenta aut cæmento aut calce aliâ, quàm è puro auro argentovè decocta linire & ferruminare præteritis: præsertim, cum Livoniæ pars alia, cujus Revalia caput est, nusquam in Poloni fuerit potestate; alia pactis Stumdorffensibus jam ante nobis accesserit. **LIVO.** Quæ de Imperio Rom. affers, viderint alii; quæ de Livonia nostra promissis, oracula quidem sunt, sed è nullo Apollinis tripode. **Quid enim? Livoniæ pars Stumdorffensibus pactis, ad præfixum usque induciarum tempus concessa vobis est, vos perpetuum inde jus in eandem vobis asseretis? Revaliam, & adjunctas illi partes negas in Poloni unquam fuisse potestate? aliud profectò assereres,**

reres, si veritatis testem Historiam consulisses. Balthazaris Rus-
 sovii historiam nosti? fidem homini abrogare de sua patria
 haud poteris. Revaliensis patria est, & Verbi, quod apud vos
 eximia scilicet dignitatis est, Minister. Sub finem secundæ par-
 tis Chronici Livonici, cum de Moschi victoriarum cursu, & oc-
 cupatis ab eo in Livonia urbibus ageret, *Ad postulationem*, inquit,
Magistri Ordinis Gothardi Kettleri, Rex Polonia Sigismundus Augu-
stus, residuas in eâ regione provincias & urbes possedit. Inter residuas
 porrò urbes, & à Moscho necdum occupatas, Revalia erat. Sic-
 ut ergo in alias, ita & in Revaliam, jus omne, quod habuit Ma-
 gister Ordinis, in Polonia Regem transfudit. Suecus. Atqui,
 illo eodem tempore, ipsa ultro Revalia, in Erici Regis Sueciæ
 potestatem concessit, ut Russovius idem testis est. Livo. Con-
 cessit, sed nonnisi postquam in Regis Poloni jus & potestatem,
 per præviam Magistri Ordinis traditionem, transierat; proinde,
 nonnisi per meram à novo suo Rege defectionem, ideoque nul-
 là, hoc est, à nullo sibi concessa potestate. Hinc Magister Ordini-
 nis, aut potius novus jam Dux Curlandiæ Kettlerus, postquam
 Regi Poloniæ Livoniam, quæ sub ipsius habenis residua hæte-
 nus, & à Moschi unguibus eximia superfuerat, omnem tradidit;
 postquam ipse quoque, ex pactis cum Rege foederibus, Curlan-
 diam & Semigalliam, tanquam Dux novus ab eodem Rege crea-
 tus, possedit; ubi de istis Revaliensium molitionibus, & tentata
 ad Suecum defectione intellexit, *Legatos suos* (sic enim initio par-
 tis tertiæ in eodem Chronico memoratur) *Dominum à Dohna,*
Ioannem Fischer Cancellarium, & Iudocum Cloed Consiliarium, ad Re-
valienses misit; qui eos à proposito debortarentur; nevé se Regi Sueciæ
juramento obstringerent, omnino intercederent; eò quod Revaliam, unà
secum, ad Regem Polonia vellet traducere. POLON. Utinam non mo-
 dò Livoniam & Curlandiam, verum & ipsam quoque Reva-
 liam, huic Reip. asserendi tempus esset! Verumenimverò, si illo
 ante Stumdorffensia pacta jam tempore, etiam cum Livoniæ
 detrimento, magnus ille in Rep. senator, uti tute testis es, alle-
 vandam navem censuit, quid nunc faciendum? Livo. Quid

faciendum? & quidem nunc! Nunc equidem, sine immani sacrilegio fieri non poterit, quod tunc sine insigni scelere fieri vix potuit. POLON. Etiamnè sacrilegii fulmina tu hic jactabis? Ne sceleris quidem arguendi sunt eorum Manes, qui pro civium suorum, Reique pub. salute, spectante Christiano orbe ita defudarunt. LIVO. Absit, ut ego vel sacrilegii, vel etiam sceleris eos arguam: at viderint, ne res ipsa satis arguat. Quid enim? ut de sola Livonia mea loquar: in eandem Regni societatem vobiscum coaluimus; Socios igitur Reip. vestræ, & quidem nulla ipsorum causâ, hosti prodere, aut tunc sine scelere potuistis, aut nunc potestis? Quot, & quanti è Livonia nostra viri, ob fidem Regi & Reip. servatam, sedibus, patria, bonisque omnibus suis eversi, perpetuo exilio & aliis calamitatibus confluantur; & hos sine scelere, aut tum deserere potuistis, aut nunc potestis? Quot myriades, imò myriadum myriades, animarum, in Ecclesia Orthodoxa Christi sanguine assertarum, luporum faucibus objectæ sunt? Et hoc sine scelere, ne dicam sacrilegio, fieri potuit? præsertim, cum ne libertas quidem Religionis tantillum curata fuerit: aut, si fuit curata, & (ut quidam asserunt) etiam concessa, nullis tabulis publicis, per oscitantiam, & animi væcordiam, firmata non fuerit. POLON. Jam tu sensim, à scelere ad sacrilegia gradum, ut video, facis: & vereor, ut eximii quidam inde esse possint. LIVO. Magis fortasse verebere, si cetera audias. POLON. Et quæ illa tandem? LIVO. Non ignoras, Livoniam gentilium tenebris & idolorum cultu, gravissimè olim laborantem, sub Annum Christi MCLVIII, à Christianis, urbe Brema oriundis, repertam; & mox à Menardo, sub Alexandro III. Pont. ceterisque deinceps Episcopis & Archiepiscopis Rigenfibus, adjuncto Militum, principio quidem Ensiferorum, deinde verò Theutonicorum præsidio & armis, subjugatam Christo, & singulari Deiparæ Virginis patrocínio fuisse mancipatam. Istud ergo, & quidem tantum Deiparæ Municipium ac Peculium, ejusdem adversariis mancipare sinè scelere & sacrilegio potestis? SUECUS. Cavetis, nos quanquam à Roma-

na Ecclesia alienos, inter Deiparæ adversarios accensere. POLON. Si de Suecis duntaxat egisses, inter adversarios istos accensendi, vix eratis: at quia etiam de alienis ab Ecclesia Rom. verbum tibi unà excidit, tu videris, quem ad censum referri queatis. Verum hæc extra oleas, ut ajunt. Tu porrò ad ea quæ porrò restant, perge. LIVO. Non potes ignorare, (si præsertim innoxias illas, & admodum pias agricolarum in Livonia mentes, unquam ingeminantes audisti) qui sit Provinciæ totius sensus; quem ex eorundem agricolarum vocibus facilè assequi etiam potes. Ajunt enim vulgo, Cùm Livonia DEIPARÆ Virginis proprium sit Peculium, sive Municipium, nunquam in ea bene erit, aut benè esse poterit, nisi in ejusdem Deiparæ postliminiò asseratur potestatem. POLON. Quo ista spiritu, rudes illæ, & uti dixisti, innoxie animæ denuntient, Tertullianus, libro de Animâ fortasse divinarit: ego non alium hîc agnosco spiritum, quàm quo, Magnus ille Poloniæ nostræ Apostolus, & Regum ac Reip. quadraginta propè annos Ecclesiastes Petrus Scargo, (præsertim cum de Prussia ac Livonia, pro Comitibus, peroraret) agebatur. Et ille quidem solam Provinciæ patriæque meæ, ex Ecclesiasticâ in civilem potestatem deplorabat metamorphosim; isti verò insuper in sectariorum se redactos potestatem, haud injuria ingemiscant: ille neque è Livonia, neq; è Prussia, ob dictam metamorphosin, commodi quidquam in Remp. dimanare posse augurabatur; isti vero quas non deplorant, proserpentes in utraq; Provincia, ab hæresi calamitates? Quid enim ab eo usq; tempore, non est passâ à Boreo isto latere Resp. detrimenti? quid non ex alterutra Provinciarum istarum, tanquam è patente malis omnibus ostio in eam redundavit? Propè est, ut hic usurpem divinum illud, *Ab Aquilone pandetur omne malum*; præsertim, cum nostra quoque memoria & Caroli Sudermanni, & Gustavi Adolphi, & Caroli Gustavi, non alia ferè, quàm ista Livoniæ Prussiæve porta tantam effoderint in Remp. malorum eluvionem. LIVO. Si hætenus, ab Aquilone, ut dixisti, pandebatur malum, quanto magis pandetur, si hosti perpetuo jure addixeris Livoniam. Quid si Livoniæ ad-

junxeris

junxeris insuper & Curlandiam & Semigalliam? Antehac, nonni-
 si sulcato navibus Balthicis accessum ille in Poloniam habuit;
 nunc si ad solam Livoniam ei tradideris, Proximus tibi semper, ô
 Polonia, ardebit Ucalegon. Antehac hyemes tibi utrunq; erant
 tutæ, cum nulla per Balthicum pateret, navigatio: at nunc, *noctes*
atq; dies patebit atrij annua Ditis. Antehac, ut vires ad invadendam
 concutiendamque Poloniam sibi acueret, in illo, omni ex parte
 asperrimo, & cautibus rupibusque horrendo ubique Sueciæ suæ
 regno, *Sugebat* (liceat enim sacrum illud carmen, Deut. 32.
 per parodiam huc transferre) *mel de petrâ, oleumque de saxo*
divinissimo; at si Livoniam possideat, *Comedet*, ut idem carmen
 prosequitur, *butyrum de armento, & lac de ovibus, cum adipe arietum,*
& agnorum filiorum Basan. Dicat enim vel hic ipse, an non Livo-
 nia una, & opibus, & fructibus, & omni hominum rerumque co-
 piâ, universo præstet Sueciæ suæ Regno? SUECUS. Est prope-
 modum, ut dicis. LIVO. Etiam sinè addito, *Propemodum*, est:
 quod tu inficiari si velis, minimè inficiabuntur; qui Livoniam
 ad centum viginti leucas, sive milliaria Germanica, in longum,
 in latum verò ad triginta, sæpe etiam ad quadraginta, protendi
 sciunt; aut qui, vel unicum Rigense portorium (ut nunc cete-
 ra omnia terræ marisque commoda mittamus) ad gerenda pro-
 movendaque tanta bella sufficere Sueco non neſciunt: ut nullâ
 re magis armare in vos æternum hunc, Poloni, hostem possitis,
 quàm si, vel ex unico Rigensi portu, æternum illi nervum belli,
 adversum vos subministratis. POLON. Quàm cuperem, ut ista
 accuratius expenderent, qui internos & videri, & diciamant
 Politici! LIVO. Quàm vellem & ego, ut isti iidem Politici paul-
 lò cum Deiparæ Municipio agerent politius! At vide nimiam
 hominum politiem. REGINAM POLONIÆ, nun-
 cupato publicè voto, & Regis sui, & suo nomine ac verbis, nu-
 perrimè dixerunt: at nunc de conservando Reginæ suæ integro
 Regno, quantum laborant! Dionysius Sicilia Tyrannus, Deos
 suos thure venerari solitus erat, cum interim aurum, & alia in-
 gentia dona iisdem dicata rapèret: vereor, ne quid istiusmodi, de
 Poli-

Politicis istis vestris liceat vsurpare. **POLONUS.** Impietate Tyrannus ille, nostri causis justis aguntur. **LIVO.** Ne ille quidem, causas impietati suæ prætexere nesciebat. Auream Æsculapio Apollinis filio barbam revulsit, quòd diceret, imberbis patris dedecere barbatum filium esse: vestes auro gemmisque nimirum graves, ceteris rapuit, quod easdem, per æstatem quidem calore nimio, per hyemem verò pondere ipso, graves esse Diis censeret: Ita & vestris istis causæ nunquam desunt; at tanti nunquam erunt momenti, ut ad revellendas Reginæ vestræ ditiones unquam futuræ sint pares, aut videri etiam satis justæ possint. Quod si aliis Reginam vestram provinciis, quibus tanquam peplo quodam & chlamyde Regiæ amicitur, spoliari nefas est; Livoniâ, quæ non recens, sed tot etiam seculorum possessione municipium, ac peculium, & quasi hereditas quædam ipsi firmata est, spoliari fas erit? **POLON.** Nunquam Politicis nostris, hac similibusvè in causis, tantum liceret, si Ecclesiastici (quorum maximam scis in Rep. & auctoritatem & potestatem esse) aliquantò plus vellent sibi licere. **SUECUS.** Exspecto, ut dicatis, quantum libet, tantumdem utrisque licere. **LIVO.** Ego quidem hoc non dixerim; **POLON.** Neque ego: vereor tamen, ne de quibusdam eorum dici jure possit: quibus ut otio genioque indulgere suo scilicet queant, omnia licent. **SUECUS.** Quocirca, ut otio genioque indulgere suo possint, inter alias pacis conditiones, nobis Livoniam concedant; in qua nos quoque genio atque otio indulgeamus nostro. **LIVO.** De otio vestro, non est, quod verba facias; novit orbis, quantum otii sitis amantes. **SUECUS.** Saltem pacis & fœderum amantissimi sumus: quam pacem traditâ nobis Livoniâ, vobis nobisque æternam reddetis. **LIVO.** Æternam dixti; Momentaneam dixisses, non ita longè abiisses à vero. Vidimus, & adhuc videmus, Æternam istam, quam vos inire scilicet pacem soletis. **SUECUS.** Quæ antehac vobiscum acta sunt, mitte; futura, & præsentia intueri. **LIVO.** Id quidem ego potissimum ago: quocirca dum præsentia ac futura intueor, nullam vobiscum firmam pacem sanciri posse video.

SUECUS. Et quæ tu præsentia intueris? LIVO. Pacem hoc ipso tempore cum Dano factam. Quam ille graves sibi ac Regno suo iniit conditiones? quàm multas, non urbes modò, verum & Provincias vobis concessit? quid non egit, ut firma vobiscum pace frueretur? Quo plura vobis sunt concessa, eò plus ad residua est accensa cupiditas vestra; eò magis armatus est adversus eundem Regem furor vester. Abrumpo: res enim ipsa loquitur: eademque si Livoniam vobis tradamus, loquetur. Nam per vos, ita res geruntur, ut vulgare illud quisque nobis accinere queat; *Sicut erat in principio, & nunc, & semper, & in secula*; nemo tamen jure succinat, *Amen*; multò verò minus, *Gloria Patri, & Filio, & Spiritui Sancto.*

